



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10

TAPAK 7

Saisapong tenzükshitsü asoshi sentong yangludat: Rijiju

Tanü PM Modi-i rongsenkettsüng atema CMs den o lemteptsü



VOL. XVII NO. 193 (ADOK 193) DIMAPUR

TENTONÜ (MONDAY) MONUPII (MAY) 11, 2020

₹ 5.00

Taonung tsüngtsüng temer sarasademtsü

Dimapur, May 10 (TYO): May 11, Hombar aonung Dimapur aser temeket aliba arogotem ajak nung 7:00 ako shitak nung sentep tsüngtsüng minute 3 atemtsü aser idangji arogo shia nung amangba purtem ajak pei pei kimai alur külemi Tsüngrem nem Covid-19 tashidak nungi asenok ajak kümzüka ayuba atema tenüngsang agütsüba sarasadem mapang ka agidi ta Dimapur Area Ao Baptist Pastors' Fellowship (DAABPF) ajanga metetdaksüogo.

Iba kasa sarasadem mapang, ano maneni Tsüngrem tawabangba taochi meshia

sarasademtsü aser kasa tashidak wara agi asü ama ataloker mangyim jashi nung aliba kibongtem asoshia tesünap meshija sarasademtsüdi ta DAABPF lenirtemisa metetdaksü.

Ano, parnokisa amangba purtem ajak dang Covid-19 tashidak wara tongpang nung yakpang nung inyakertem ajak asoshi teküzmükba aser tashi meshija sarasademtsüba den külemi, ano government nung ketdangpurtemia senotsü amshiba nung ochishia inyaktsüsa tangatetba shisatsü agüjang ta sarasademtsütsü tayongzüka agütsüogo.

Mokokchung-i Jorhat den arrtsü shibanger

Dimapur, May 10 (TYO): Assam kübok Jorhat district nung Covid-19 putetba nung ajemdaker Mokokchung district administration-i Tzutapela aser Watiyongpang nung inter-state check gate tem shibangogo.

Mokokchung deputy commissioner Limawabang Jamir-i Honibar aonung tetuyuba ka agütsüba nung, check gate ana adena nisung aser gari senzüba ajak noktanger ta metetdaksüogo.

Iba tetuyuba sülen manidakertem IPC indang Arlla 188 kübok temerenshi alitsü, ta paisa ashi.

"Pei talidak toktsür Dimapur

nung anendaka alirtemi Assam ajanga Zunheboto/Tuensang/Longleng aser Mokokchung-i arurtem jangjatsüla, kechiyong parnok kari Jorhat nung anenzüker alitsü akok" ta DC Limawabang Jamir-isa metetdaksüogo.

Ano, Sub Divisional Officer (Civil) Changtongya, Moakumzuk Tzudir-ia tanü sangdong ka nung "iba office ajanga Jorhat/Amguri/Halwating nung ljalijongtsü atema temelaba agütsüba ajak meyipa agir" ta metetdaksüogo.

Tensa tajungba akümba sülen ang permit tasen agütsüshitsü, ta Moakumzuk-isa ashi.

Nagaland sorkari school melapoktsü nenshir

Dimapur, May 10 (TYO): Linük ajunga shibangba mapang school tem lapokra temerenshi alitsü ta Nagaland sorkari tanü metetdaksüogo.

Sorkari melapoktsü tuyuba ama nija aser sorkar school ajaki iba tetuyuba sülen anidaksüla, ta School Education Department, Principal Director, Shanavas C-i Deobarnü sangdong ka nung ashi. Ozüng alema inyakertem nem

tapet temerenshi agütsütsü, ta Shanavas C-isa metetdaksüogo.

Nagaland nung school kari class tenzüktsü sangdongba osang angashir sorkari iba tetuyuba ya agütsü.

Sorkari lapoktsü temelaba agütsüba sülen ang kaketshirtem school-i yokang ta Principal Director-i tsüraburtem aser guardian tem dang metetdaksüogo.

Y. Kikheto Sema, IAS-i Dimapur district ketdangsütsü

Dimapur, May 10 (TYO): Public tajungba tenzüktsü atema Nagaland sorkari Dimapur district nung COVID-19 dak sendakba maparen ajak ketdangsüa inyaktsü atema Agriculture Production Commissioner, Y. Kikheto Sema, IAS nem mapa lemzüksüogo.

Dimapur nung Containment Zone agiener: Taoba mapang tetuyuba balala agütsüba den Dimapur nung Chief Medical Officer (CMO)-i ashiba nung ajemdaker Containment Zone kübok Thakurbari tesem madener

ta Dimapur Deputy Commissioner, Anoop Khinchi, IAS-i tanü sangdong ka nung metetdaksüogo.

Linük ajunga shibangba nung teinyaktsüsen aser National COVID-19 tetuyuba nung aliba ama iba tesem nung nisung o nisung tsüngda tepila ayutsü nenshir, ta Dimapur DC-isa ashi.

May 11, 2020 nungi iba tesem Containment Zone kübok ayuba agiener saka tetuyuba agütsüba sülen manidakertem Disaster Management Act 2005 aser IPC kübok temerenshi alitsü, ta paisa shisem.

Nagaland Govt-i senotsü meyaka amshitsü lemtet

Dimapur, May 10 (Agencies): Coronavirus wara indang tebilemsü aser rongsenkettsüng jenjang mejungi akümba ajanga Nagaland state sorkar-i senotsü meyaka amshitsü atema telemtetba kar agiogo.

Yashi Cabinet senden nung küm ka atema Chief Minister aser Minister tem indang itasen nungi 35% katizüktsü lemtet. Senden nungsa Minister tem nem agütsüba Discretionary Fund magütsü atatsü aser ita trok atema regular/work-charged/muster roll/adhoc/consolidated pay/ temporary basis kübok sorkar mapa nung nisung shinga manioktsü atema telemtetba agiogo.

Cabinet-isa govt. gari yanglushiba, anepaluba aser



Neiphiu Rio (File Photo)

senotsü aotsü atema sen magütsütsü, gari tasentem, computers aser kangabo

menüngdakba osettem malitsü. Iba denji department ajaki sen endokba nung 10% ajemtsü, state adena orr aliba sorkar ketdangsertem nem gari totzüttem asoshi sen magütsü aser linük adena bendangleni aotsü memelatsü.

Nagaland sorkarisa nüngdakba osangtem dak alaka Notice Inviting Tender indang advertisement/publication masütsü, gari amshiba atema sen magütsütsü aser kiojen yanglutsü atema sen magütsütsü telemtetba agiogo.

India sorkari senotsü agüja inyakba Centrally Sponsored Scheme tem inyaktsü aser state-i agütsütsü sen lemzüka nungi 15% ajemtsü atema Cabinet-isa telemtetba agiogo.

Nagaland nung nisung 7,409 pei talidaki ogo

Dimapur, May 10 (TYO): Nagaland nung May 7, 2020 nungi Inter-District senzütsü temelaba agüja yashi tashi tesem balala nung anendaka alirtemi pei pei talidak bushia ogo.

Tang tashi nung bus 281 nung nisung 7,409 tashi pei pei district bushia ogo, ta Principal Secretary Home, Abhijit Sinha-i Deobarnü metetdaksü.

State sorkari Nagaland kübok district o district tsüngda senzütsü atema May 11 nungi 13, 2020 tashi mapang agütsütsü telemtetba agiogo. Ajisüaka, iba mapang May 8, 2020 nü Facilitation Center balala nung tenüng agüja alirtem

nem tamasa maongka agütsütsü, ta Abhijit-i ashi.

Pei talidak toktsür tangalen anendaka alir kari pei sasa dang onüra, Deputy Commissioner dang nungi temelaba meshitsü akok, ta paisa shisem.

Tang tashi nung Nagaland nung sample 862 tashi COVID-19 tendangtsü atema bener yokogo. Sample 806 tashi negative ta putetba osang nguogo aser sample 58 indang osang ano mangu lir, ta Abhijit-isa ashi.

Tanü nisung 7565 tashi screen asü aser nisung 100 tashi Facility Quarantine nung yua lir, ta Abhijit-isa metetdaksü.

May 9, 2020 nikongtsütsü 4:00 ako tashi nung Nagaland COVID-19 Toll Free Helpline Number 1800- 345-0019 nung call 193 aru aser iba nungi call 46 tashi telemedicine consultation dak sendakba indang liasü, ta paisa ashi.

Tangalen anendaka aliba nisungtemi Nagaland-i arutsü atema website iamstranded.nagaland.gov.in nung tenüng agütsüdar. Tanü nikongtsütsü 4:00 ako tashi nung nisung 15,000 temai tenüng agütsüogo aser sorkar dang parnok arutsü atema teyari meshiogo, ta Abhijit-isa ashi.

Arunachal aser Assam nung NSCN züngsem 2 apu

Dibrugarh, May 10 (Agencies): Assam aser Arunachal Pradesh nung sepaitemi maparen balala inyakdang NSCN telok balala nungi züngsem ana puogo.

Arunachal Pradesh kübok Changlang district nung Assam Rifles aser police-i NSCN (Khaplang-Kitovi) züngsem ka apu.

"Osang tejangja ka angazükba sepaitemi iba tesem mita aodang NSCN (Khaplang-Kitovi) indang political officer ka apu" ta police-i ashi.

Iba nisungji Captain Hangnong Pangtha ta jangjaogo, ta parnokisa ashi.

Pai NSCN (KK) tenüng nung tashiyim agi sen saru. Pai Tirap-Changlang-Longding tesemtem

nung mapa inyak, ta police-isa metetdaksü.

Külen, Army aser Assam Police yaritepa Assam kübok Sivasagar district nung NSCN (K-Yung Aung) züngsem ka puogo.

Iba nisungji Mon district kübok Namsa nunger Private Laipa Konyak ta jangjaogo, ta sepaitemi ashi.

May 12 nung passenger train senzüdaksütsü

New Delhi, May 10 (Agencies): Indian Railways-i May 12, 2020 nungi passenger train tem senzüdaksütsü atema telemtetba agiogo.

Indian Railways-i mezüng atema train 30 amshia passenger train service tenzüktsü sentong lir.

Train temji New Delhi

Station nungi Dibrugarh, Agartala, Howrah, Patna, Bilaspur, Ranchi, Bhubaneswar, Secunderabad, Bengaluru, Chennai, Thiruvananthapuram, Madgaon, Mumbai Central, Ahmedabad aser Jammu Tawi tashi senzütsü.

Iba sülen Indian Railways-isa lenmang tasentem nung special

services tenzükshitsü. Ajisüaka, tamasa parnoki COVID19 care centre atema train takdang 20,000 lemzüksütsü.

Aayangertem asoshi "Shramik Special" ta ser anogoshia train 300 tashi senzütsü atema sentong lir, ta Railway Ministry-i sangdong ka nung metetdaksüogo.

CORONAVIRUS WARA ASENOK LONGJEMERAKOKTSÜ ASOSHI-

Kechalena Moi Kidang Mongang; Tangar Anasai Tou; Teni Tebang Sü agi Nembangang; Temang Tashi Itita Yuang; Kidang Asentzü Sendoka Exercise Agiang aser Sarasademang.



Kiphire nung DTF senden menogo



May 09, 2020 nü Deputy Commissioner, Kiphire indang conference hall nung Kiphire DTF pur senden ka alidang Deputy Commissioner aser DTF mendenpula, Sarita Yadav IAS-i jembiba noksa nung angur.

Dimapur, Monupii/May 10 (TYO): May 9 nü DC conference hall nung District Task Force Kiphire senden ka mena onük balala benoka sensaksemogo.

DTF mendenbubai, Covid-19 empowered group-i tarutsü nung Northeast state balala nung taolen makai aliba nüburttem senzusenpongtsü asoshi temelaba agütsütsü akok, ta metetdaksü.

Medical department-i, parnok den yariteptsü asoshi ministerial staffs timba nüngdaksü ta metetdaksü, kechiyong Northeast state balala aser linük nung tesem balala nungi nüburttem ano aika meyipa arutsü imlar. Iba dak sendakba nung EAC HQ Chumbenthung Murry nem department-i nüngdakba staff tem tanga department nungi

bendentsü asoshi nongloktsüogo.

YTC den longjemer USLP aser ESH züngsemtem nem, Northeast state tem nungi maruteti alir arutsü janraratem indang osang tejangja bendentsü asoshi nongloktsüogo. Iba den ano parnok dang VC aser VDB den longjemer Kiphire district kübok yimtsüngtem nung quarantine centre balala nung facility amenoka alibattem asadangsü asoshi mepeshia asüngdangogo.

Linük nung Red Zones tesemtem nungi nisung kar danga arura aser kodang arudir idangji parnok quarantine asütsü asoshi center nüngdaksü ta angateta, mendenbubai EAC (S) Chenithung Ovung dang Circle officers tem ajak dang

quarantine facilities amenoka aliba yimtsüngtem indang osang tejangja agütsütsü asoshi tuyutsü shiogo.

Maneni mendenbubai, lokti tentettem aser area representatives tem dang tanga state nungi arurtem kiyong/yimtsüngi aitdaksütsü maitdaksütsü ta ashishi aser kasaji yimtsüng cluncil ajak nem metetdaksütsü.

ADC HQ Nyempo-i, Kiphire Town Council inyakym indang metetdaksü. Addl SP-i, Covid-19 tashidak den raratsü asoshi ajak longjemer inyaktsüla ta shia, loktitentet balala aser nüburttem dang teka amteper inyaktsü mepeshi. Mendenbubaisa, lokti nung inyaksangshiba mapang tetsüngda ita inyaksangshitsü asoshi nüburttem mulungi idaksütsüla, ta ashi.

Meriema aser K. Badze quarantine centre renemogo



Rüsoma, K. Badze Quarantine Centre, Control Room achaayangba ketdangsertem noksa nung angur.

Dimapur, Monupii/May 10 (TYO): Nagaland nung tang tashi nung coronavirus agi shiranger ka danga meliaka, Covid-19 tashidak poktetba mapa nungi state sorakari lenla balala ajanga iba tashidak nokdangsü aser prokshia meyoktsü asoshi jenjang tapet agia arudar.

Nisung ka indang jenjang tejangja metettsü aser tashidak moputet tsüngda prokshia meyoktsü asoshi, EG-i achaayangba state sorkari BSUP buildings Meriema aser K. Badze, Rüsoma nung tanga state nungi arurtem ayutsü asoshi quarantine centre ana amenokogo.

Item kitem meyanglushi amshitsü tamakoktsü liasü aser iba den kümtem tsüngda

jananongna agi ki temeket ajak menener tamshi mejungi liasü. Ajisüaka Housing, Medical, Municipal Affairs, PHE aser Power department nungi team kati kanga meranga iba ki yanglushiogo aser ki temeket ajak merektetogo. Parnok mapa tajung asoshi Control room nungi ketdangsertemi parnok nem tenüngsang agütsüogo aser iba amala tensa majungba mapang department temi tejakdangi arua teyari agütsüba atema parnok danga pelaba lemsatepogo.

Empowered Group-i tenüngdakba osetem agütsü aser inyaksangshitsü asoshi medical department nem bendanga agütsü. Tang K. Badze aser Meriema nung yipden 545 aser 254 inoktsüogo aser iba den takdang den toilet aser bathroom

atonga yanglur amshitsü asoshi renema lir. Iba den bendenloksema ATI, Kohima nunga yipden 10 inokja lir. Tang tashi nung tanga state nungi arur nisung 22 Meriema Quarantine Centre nung mungdaki.

Osang ajanga ashiba agi, yipden agi meperitsüsa kümra Govt guest houses aser private hotel tem amshitsü asoshi Empowered group-i tongtepratepdar.

Empowered Group ya Additional Chief Secretary & FC, Sentiyanger Imchen, IAS lenisüba kübok inyaksangshir aser department balala nungi ketdangsertem iba telok nung densema lir. Iba telok nem state adena orr aliba Naga nungertem anepalutsü asoshi nongloktsüogo.

Dimapur nung cement jenjang atettsür

Dimapur, Monupii/May 10 (TYO): Kidanger state nung market rate asadanga aser osettsüset balala nung jenjang atobatem abidanga aser May 02, 2020 nü Sub- Committee on price Monitoring puri lokti tentet balala den senden amendang lemtetba ama cement brand balala indang jenjang atettsüogo, ta Deputy Commissioner, Dimapur, Anoop Khinchi, IAS-i sangdong ka ajanga

metetdaksü. Sangdong ajanga ashiba agi, Star cement bag ka nung sen 470, Dalmia cement bag ka nung sen 470, Topcem bag ka nung 460, Amrit cement bag ka nung sen 450 aser Surya Gold cement bag ka nung sen 450 alitsü aser yangji loading charges dena lir.

Iba totuyuba ya tang nungi tenzüksü aser nüburttemi iba totuyuba nung shidak anidaksü metetdaksür, ta sangdong ajanga ashi.

Empowered Group on COVID-19 pur senden ayonger

Dimapur, Monupii/May 10 (TYO): Anempongba anogo tembangba sülen nüburttem state-i meyipa arutsü aliba dak sendakba ken o jembitsü atema senden ka Bank Colony, Dimapur nung aliba Commissioner indang rest house nung May 11, 2020 anepdang 11:00 ako nungi alitsü, ta Secretary, F&CS aser Empowered Group for COVID-19, Dimapur züngsem,

W. Honje Konyak-i sangdong ka ajanga metetdaksü.

Anungji District Education Officer, Dimapur, All Nagaland Private College Association nungi züngsem asem, All Nagaland Private School Association nungi züngsem asem aser Accommodation Committee nungi züngsem ana iba senden nung arua adentsü metetdaksür, ta sangdong ajanga ashi.



May 09, 2020 nü Heningkunglwa village council-i PMGKAY scheme kübok AAY aser PHH ration card alirtem nem jang angadi agütsüba yangi noksa nung angur.

Longleng Town Council-i totuyuba tasen agütsür

Dimapur, Monupii/May 10 (TYO): ADC aser Longleng Town Council nung Administrator, D. Robin-i jila nung nüburttemi inyaktsü/anidaksü asoshi totuyuba maneni agütsüshi, koba tang nungi inyakyonga aotsü.

gari nung driver maden nisung asem dang amentsü melar.

Dokan kibur/nisung shibasa pei kidang nungi mapa balala atema ayazüker, parnok ajaki mouth mask amshitsüla.

Dokan kibur/business establishment ajaki social distancing yimya kanga junga amshitsüla.

Dokan kibur/business establishment ajaki hand sanitizer agütsütsüla/customer aser mapa inyaker teka shitoktsü atema tesem yanglua ayutsüla. Iba totuyuba nung aibelener nem ozüng nung aliba ama tapet temerenshi agütsütsü, ta sangdong ajanga ashi.

Sangdong ajanga ashiba agi, sorkar totuyuba nung nokdanga aliba dak alaka dokan/business establishment tem anepdang 7:00 ako nungi anüngdang 12:00 ako tashi lapoktsü melatsü.

Jila nung jajaba gari ajaki social distancing yimya amshitsü, kong tetsüng ana aketba gari nung nisung ka dang amentsü aser tetsüng pezü aliba

Mon Deputy Commissioner-i metetdaksü

Dimapur, Monupii/May 10 (TYO): Deputy Commissioner, Mon Thavaseelan K, IAS-i, linük ajunga mokdang aliba aser school tem shibanger aliba mapang District Administration, Mon-i Secondary School Students tem academic session asoshi bilemja May 4 nü nungi You Tube Channel (Deputy Commissioner Mon) ka nung Secondary kaketshirtem atema hopta shia tinyaktsütem indang video inokja arudar, ta

metetdaksü.

Iba dak sendakba nung kaketshirtem dang Academic Session tenzüksü mapang item tinyaktsütem Rüsoma Schools nung K. Badze Quarantine Centre, Control Room nung aliba pei tata ketdangsertem nem agütsütsü asoshi metetdaksüogo

Anungji tsürapur aser kaketshirtem dang iba maongka agitsü asoshi mepeshia metetdaksüogo.

Tripura nung COVID-19 care centre lapokba anema lungkak ait



Bhagat Singh Youth Hostel nung Corona Treatment Centre lapokba anema Deobarnü nisungtemi gari lenmang mokdang lungkak aitdang police aser administration ketdangsertemi lungkak aiterem anienba noksa nung angur. (Agartala, May 10)

Agartala, May 10 (Agencies): Tripura sorkari Agartala nung aliba Bhagat Singh Yuva Awas COVID-19 care centre ka kümdaktsütsü lemtetba anema tanü nisungtemi lungkak aitogo. Iba ya Agartala kübok New Capital Complex nung lir aser Deobarnep nisung aika adenshir VIP road mokdang lungkak ait. Tripura nung nisung aika dak COVID-19 aliba putetba sülen state sorkari iba youth club ya COVID-19 care centre ka kümdaktsütsü lemtet. Iba youth club nung khen nung nisung 300 shi anepalutettsü akok. Iba hostel ya Tripura secretariat aser assembly building anasa lir. Honibar aonung iba hostel-i COVID-19 agi shiranger 27 tashi anir aruba sülen iba temeket nung alirtemi tanep lungkak ait ta osang ajanga ashi.

Mumbai nungi Assam nung shirangertem taonung atongtsü

Guwahati, May 10 (Agencies): Assam nung cancer agi shirangertem aser parnok yaritem Mumbai nungi bus trok nung Guwahati tashi anir arutsü asoshi ayamesogo aser parnok Hombar aonung Guwahati tonga arutsü. Assam Bhawan, Mumbai indang Joint Resident Commissioner, Devasish Sharma-i manemertem meina arudar aser pai ashiba agi, "shiranger aser parnok anepalutettsü asoshi India ajunga shibangba ajanga Assam state adena orr tanga tesemtem nung shirangertem shilem asem lemsar state sorkari parnok nem rongsen teyari agüja liasü. "Timtem kaji, mapang shia bus ya anentsüsa akümer. Iba jagi mapang talila agir. Ajisüaka, iba ya shisabutsüba onük ka masü," ta Sharma-isa ashi. COVID-19 aziüoktsü asoshi India ajunga shibangba ajanga Assam state adena orr tanga tesemtem nung shirangertem shilem asem lemsar state sorkari parnok nem rongsen teyari agüja liasü.

Meghalaya nung anogo 6 atema yi dokantem lapoktsü

Shillong, May 10 (Agencies): COVID-19 wara aziüoktsü asoshi India ajunga shibangba mapang, Meghalaya nung Hombar nungi tenzüka anogo trok atema yi ayokba dokantem lapoktsü osang metetdaksüogo. Ajisüaka, nisung o nisung tsüngda tepila ayutsü atema international arrtsü anasa aliba yi dokantem, lenmang aser lane sadema maliba tesemtem nung lapokba yi dokantem aser COVID-19 wara menatsü ta tsüba bilemba tesemtem nungbo melapoktsü, ta sorkari tetuyuba agütsüogo. "May 11 nungi May 16, 2020 nü tashi anepdang 9:00 ako nungi nikongdang 4:00 ako tashi teshimtet wine store aser item store den sendaktepa aliba warehouse lapoktsü melar" ta Meghalaya Excise Commissioner, Pravin Bakshi-i metetdaksü. "Customer shia dang foreign liquor mesüra yi litre asem dak tema aser beer litre pezü dak tema mayoktsüla," ta Bakshi-isa ashi. "Yi alitsü asoshi kibong ka nungi nisung ka dang dokani aotsü melar," ta paisa shisem.



Süngolu ka nung aliba quarantine centre ka nung tangalen nungi aayangi arurtem anisüngzükba noksa nung angur. Tangalen nungi aayangi arur nisung 5 Nagaland nungi Assam-i aru aser parnok Jorhat district kübok tea estate ka nung kanga mejungi anenzükdakja lir ta osang ajanga ashi. (Jorhat, May 10)

RDC hostel nung alir sample 71 negative putet

Guwahati, May 10 (Agencies): Guwahati nung aliba Regional Dental College indang hostel nung alir nisung 71 indang sample tendangba nung negative ta putetogo. Iba hostel nung alir Dr Dipa Deka dak COVID19 putet aser iba sülen nisung ajak indang sample tendanga liasü. Dr Dekaya Regional Dental College nung postgraduate kaketshir ka lir aser Hokolbar aonung la dak COVID-19 aliba puteta liasü. "Iba ya temulung anisüngzüktsü osang ka lir. Resident doctor ka dak COVID-19 putetba sülen Regional Dental College Hostel nung alir nisung 71 indang sample tendangdang negative ta putetogo" ta Assam health minister Himanta Biswa Sarma-i Deobarnü Twitter nung metetdaksü.

Guwahati nung ASF ajanga ak 37 asü

Guwahati, May 10 (Agencies): Guwahati nung ak 37 tashi African swine fever ajanga shiranga asü, ta sorkari metetdaksü. Honibar tashi nung Assam nung ASF ajanga ak 13,033 tashi süogo. Tang Assam nung district 9 nung iba wara agi tonga lir, ta sorkarisa ashi. ASF agi tonga aliba district tem rongnung Dhemaji nung tamajungtiba kongshia lir. Iba district nung ak 6,309 süogo. Iba sülen Majuli nung ak 3,449 aser Sivasagar nung ak 1,306 asüba osang osang lir. National Institute of High Security Animal Disease (NIHSAD)-i Assam nung ak asübaji African swine fever ajanga lir ta osang jangjatsüogo. Mezüingbo Assam kübok Sivasagar, Lakhimpur, Dibrugarh, Jorhat, Dhemaji aser Biswanath district tem nung ak mezüing asüba osang liasü. Iba wara ya China nungi bener aru ta tsüba bilemer aser lendong tulu majurutsü atema Assam kübok tesem aika nung ak shi ayokba noktanga lir.

Mizoram: COVID-19 free state kümogo



Zoram Medical College (ZMC) nungi COVID-19 agi shiranger ka anepalua taneptsü anguba sülen Deobarnü pa mozü kidang nungi anizükdang agiba noksa ka angur.

Aizawl, May 10 (Agencies): Mizoram nung COVID-19 agi shiranger ka aliba taneptsü ngur mozü kidang nungi anizükogo aser iba ajanga 'COVID-19 free state' ka kümogo. Khristantem teimba ser aliba state-i Manipur, Sikkim, Nagaland aser Arunachal Pradesh nung den külemi 'COVID-19-free states' nung züingsemogo. State nung COVID-19 agi shiranger ka dang aliba Zoram Medical College (ZMC) nungi anizükogo. Pa dak pezüben tashi tendangdang negative ta putet, ta Mizoram health minister R Lalthangliana-i metetdaksü. Iba nisung ya anogo 45 shi ka ZMC nung anepaluba sülen Honibar anüingdang mozü kidang nungi anizük, ta R Lalthangliana-isa ashi. Tsüingremi mapa tajung inyakba atema tenüngsang agütsür aser ZMC nung doctor, nurse aser staff temi iba mapa tajung inyakba atema pelar, ta paisa shisem.

Assam Speaker-i CMRF aser PM CARES fund nem tenla agütsü

Guwahati, May 10 (Agencies): Assam Legislative Assembly Speaker Hitendra Nath Goswami-i Deobarnü Chief Minister's Relief Fund nem Rs 1,50,000 tenla agütsüogo. Guwahati nung aliba Brahmaputra State Guest House nung Chief Minister Sarbananda Sonowal'er kidang pai Sonowal nem cheque ji agütsü. Speaker Goswami-isa PM CARES fund asoshi sen lakh ka tenla aser iba cheque jia Chief Minister nem agütsü. Speaker-i taoba mapang Jorhat semdangdang nisung aikati Assam Arogya Nidhi asoshi tenla agütsüba cheque tem tanü Chief Minister ket nung agütsüogo. Speaker-i tang tensa atema süoki ia bilema temeim mapa inyakba atema Chief Minister Sonowal-i pa dang pelaba metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, MONUPII (MAY) 11, 2020

Govt toushiba mapang

I bai Nagaland government dang masü saka alima nung Covid-19 tashidak agi tonga aliba limatem ajak senotsü agi touashiba mapang lir. Kecha lima senotsü sentong (budget) nung covid 19 tashidak arutsü imlaa sen lezmüka mali saka ajungbena talir temang taküm samatsüsa iba tasüba tashidak arunungji, joko terenlok mapatem nung endoktsü lezmüka aliba sen agizüka iba tashidak den raratsü asoshi amshitsüsa akümer, kechiyong ajak dang nungi tongtibangtibaji nisung taküm lir, anungji alima ajaklen nübortem taküm dang kumzükterra tanga mapatemjibo tesülen asentenshia tajungba inyaka otettsü ta asüba tangatetba nung mozü ki aser yangji inyakertem nungdakba mapatem nung mapang, nübo aser rongsen ajak endokba mapangji tang ya lir. Government asoshi dang masü saka industry lapoka alirtemi anir anogo sen agia ayangertem tashi takoksa aser timtem tulu ajuruba mapang, joko, tenzükadokogo. Akhi mapangbo industry ka shibangtsüsa kümra mesüra ayangertem mapai moutettsüsa kümra, government-i yarise aser temenoka agütsü saka tangbo government-ang timtatemba, anungji shingia shinga meyaritettsüba tia ka nung asenok iadokogo. Iba jagi joko center government-ia la kükok inyakertem dak nungi mesükzüksü tenzükogo. Iba kasaji, Nagaland nunga government mapa inyakertema akhi nung ngua aliba senotsü teyari karbo mangutsüsa kümogo. Iba denji ano state government-i gari totsü nung sen atuba ya shisa tatem nung sodakba mapa amai ka lir. Tensa mapang junga alidanga, Nagaland government-i la nungdak asoshi lasasa bener arutetba senbo noklangka shilem nung senpak trok dang bener arutetter, tetezü asenok nungdakba senotsü noklang nung shilem 94 jibo center government-i agütsür. Ano, Nagaland asoshi tamajungba kaji, center government-i asenok nungdak nung amshitsü agütsüba noklang nung shilem 94 nung jagi sen teimbaka ita sen aser sentsü aoba (debt servicing) nung endoker, anungji terenlok mapa inyaksü atemabo manünger. Iba ama state ka asoshi tang ama alima tensa tamajung ajuruba ya kanga lendong lir. Kasa timtemsa süaka, tanga state-tem nungbo terenlok mapatemang meinyaki anena atatsü aser iba senji tashidak wara den raraba tongpang nung amshitsü, anungji government mapa nung inyakertem nem ita sen magütsütettsüsa kumogogoo. Ajiüsüka, asenokbo mapa inyakertem nem ita sen agütsütsüba sen nungi agiteta mamshira tanga senbo maka, anungji amshitsüsa akümtsü, anungji mapa inyakertem ita sen mangutsü. Iba timtemji ngua shisaboluba agi, asenoki taoba hopta nung " Nagaland nung state government mapa inyakertem nem ita sen magütsütet aküm nunga koma süla ?" ta asüba tasüngdangba nung shisalemsatepogo. Atangji, telangzürtemi government mapa inyakertem nem ita sen magütsütetra state government laoa adoktsü aser President's Rule arutsü ta bilemba lemsatepogo. Atangji, pei mapa inyakertem nem taa magütsütetra, iba amajia ataloktsü, ajiüsüka shisabolutsü tulutibajibo, PR ji masü, ita sen achirtem ita sen mengura, Nagaland nungbo ita sen machirtem dena chi chiyong athitsüba tia ka nung asenok alir. Atangji, Nagaland government-i center government dang teyari meshia zülüogo saka timtem ya Nagaland nung dang masü ajaklen, anungji nungdak periabo magütsütettsü. Joko, Nagaland government teimlatsü ajak agi gari totsü ayokba nungi alimelen sen aika tur meshitsüba dang lir. Ibajia lokti tentet aikati magizüketter, anungji gari totsü nung sen tua alibaji agientsüla ta takangba agütsüpet agütsüdagi. Aja shiak lir, kechiyong kodang gari totzü nung sen aika kenyongi tudir, iba jagi chiyongtsü aser osettsüset ajak nung jenjang tua adoktsü aser iba jagi tesüsa dokan nung alia achir nübortemsa akoksatsü. Ano, jungjunga bilemdangra, Nagaland ama state tilaka nung gari totzü ayokertem dang nungi alimelen agiba nungia sen kwikabo arutsü ? Ano, tangbo akhi ama garitema mesenzüdaktsür, anungji gari nung totzü atsükba jenjang ya akhi atsükba dang nung tesadang dak tali agi tajemba kümogo. Aji oda, asenok ama state nungbo, gari totzü ayokertem dang nungi alimelen agiba sen jagia kechi inyaker, kechi meinyak ka akümtsü. Item ajakji shisadanga, asenok libaliro, achiajem aser inyakyim ajak nung kanga meyaka aser kumdanga alitsüba dang tangsa tenungdakba kümogo.

OLEMSABANG

AWASHI YIMYA NUNG MANGRANG APONGBA INDANG TATSÜKA LEMSATEPER

- R. Imkong Lkr, Diphupar : Dimapur.

Taküm ka liyonga aotang pei medemer, pei kiyonger, pei yimeryimsanger, pei nisung, pei tsürabor, pei tedi, tenu aser teyi nunger, pei kinüngtsür, pei kinüngbor, pei chirnurtem den külemi liyonga aotsüsa mapangi bener arutsür. Iba den külemi mapang aben lokdiliba "saka loktiliba ta masü" tapu balala nung asenok ajak adentsüsa akümer, aser koba lokdi südir süaka senden alitang lokdi nungji ajaki shilem agia tatsü aser talang, tajung aser majung ajak jembitepyonga aor. Yamaji nisung shia taküm kakaji lokdiliba shiruru ama ajaki shilem tajung agiyonga jembitepyonga aotang aseni teti ngua aliba medemer aser kodanga mengudangi aliba medemertem den nungtak tapu aika lemsatepa jembidang pei pei angatetba nungi jembitepyonga aor. Iba mapang nungji karibo lokdiji pei kisüng indang ama, oda otsüolen ajak paiang mesüra lai-ang meteta ali ama jembir, aser pei-i angatetbajiang shidakba ta bilema jembir. Yamala tangatetbaji onsara majung, aser ano karibo pei-i metetba aser angatetbaji kanga shisang shisanga tiyak sanga jembidang telok nungji aikati paji mesüra laji kanga tashitemetet ama bilemer, aser lokdi tuluba mesüra tilaba ajak nungji züngsem tajung ka ta jembiteper. Saka shidakba nungbo pa mesüra la ajanga meteta aser memeteti teraksa tulu adokdaksür alir, kechiba ta süra, pa mesüra la tu temetetba aser tangatetba kangabo mali ser nung pei sasa kanga shia metet ama bilema lokdi senden ajak nung o nung kanga mero merua jembiba agi teloki iba nisungji temetetba shisatsü lir ta bilemer aser paji mesüra laji telok nung lennitsü shimteta atar. Saka shirno kanga ajemasünga kecha memetet ama ajem ajema ola madoki tendanga mena alir, pa mesüra la dakji teti agia tangatetba shisatsü tajung alir, aser lokdi nung item amala jagiang jungjunga tip tema yimsü süteter aser lokdi kaji kanga junga tejakleni annir oteter.

Saka shibaisa telok nung pei kisüngi-ang shia metet ama, aser pei-ang angu ama aser pei kisüngiang rajema meteta ali ama tangari jembiba ajak jepzüka jembir aser kari jembia aliba tu songtema yutsüle ta jembiba jagi pur medemsur aika mulung yirutsür. Aser oda odabo pa mesüra la tu lokdi senden nung arua mena angudang aikati tanü-a jungogo, tajungsang mesüra tajungla tu arua mena lirji nibo odang oa dokdisü ta bilema atar, iba denji pei-i bilemba tajung kabosa telok nungji lemsateptsü ta bilema mena aliba tu joko ola kata madoki tezü tanga oda telok tu kodangang senshitsü ta yongyasetata ataa alir. Iba amala nübu tu kar arua telok nung densembaji, telok atema onsara tia majung kumdaktsür. Iba amala nübu tangji shitsü shingo mesük ta ajaki ajar. Yamaji iba jembizüka yokba mesüra pei sünütsü süa ngasanggadema, teyaksanga jembiba jagi telok ajak menentsür ta pei sasa metettsüla. Tanü lima nung lokdiliba tapu aika lir, saka item rongnungji tongtibangtiba telok ana angur, mezünpuba nung alima yimsüsüba lokdiliba tang shiyonga aruba lokdi tentet-tem lir, aser tanapuba telokji Tsüngremer maparen lokdiliba ya lir. Tatishitsü agi Arogo ka nung lokdiliba tapu aika lia angur, itemji Deacon telok, Christian Education telok, Sunday School Education telo, Evangelist telok, Choir telok aser kiyong shia nung tekülem sentep teloktem angur. Item ajak nungji teraksatsür temenen mojing tu karbosa densema alir ta metettsüla, aser itemji tangar masü saka pei medemer aser pei tembartem tang alir. Yamaji nisungtem rongnung kari mekümdangi lira Yisu nütsüng ter ser ana rongnung Yihuda Iskariot dak temenen tanela aiba ama ataloktsü menua mali ta angatettsüla, shiba ajanga tatem nung Yisu ashiokja senbak tatsük semer yong Rom sepai nem pa bendanga agütsü, aser tatem nung pa rishikangshia kangki nung angenloka sädaktsü.

Anungji asenok ajaki ya metetdi, Yihuda Iskariot dak temenen tanela aliba amaji mezüngyongi nisung ka dak keta malir, saka pei sasa jakla liro tamajung mazüoktetba den mezüng shia aruba amatu telok ka nung shibai mero meru yimya, tiyak asangba yimya, ngasanggadema yimya aser pei-ang shia meteta ali ama bilemba nisung tangji telok ka nung san tanak "A Black Sheep" ta ajatsü akok, aser ano tanga olen ka nung awashi yimya nung mangrang apungba ta asen tsürabor mapang nungi jembia aru.

Tatem nung asenok ajaki telok ka nung san tanak amaji malitsü merangdi ta ayongzükter.

Kanga pelar

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

US nung Arogotem yaritsü atema Lauren Daigle, Lecraen nungeri shilem agitsü



May 1, 2019 nü Las Vegas, Nevada nung aliba MGM Grand Garden Arena nung nungtuğu kentener, Lauren Daigle-i 2019 Billboard Music Awards sentong nung ken atenba noksa nung angur.

May 10, 2020: US tesem ajaklen coronavirus tensa agi kongshia timtemba Arogo tilatem yaritsü atema Khristan telok balalai inyakdar aser senotsü teyari agütsüsü atema online ajanga kenten sentong ka ayongzüka agitsü, ta metetdaksü.

Taoba ita AND Campaign aser tanga Khristan organizations-i Coronavirus At-Risk Church Relief Fund tenzüka liasü, aser iba mapatong kübok Arogo tilatem shia nem US sen 3,000 agütsüsü. Coronavirus tashidak tensa ajanga senotsü tsütsü takoksa ngua taruba ita asem tsüngdabo shibangtsüsa aliba Arogo tilatem nem parnok teyari agütsüsü.

Mezüngbo iba fund nükjidong ya April ita nungi

tenzüka tenla agütsür Khristantem, foundations aser Arogo tulutem nungi US sen 500,000 bendentsü nükjidong liasü. Ajioda April ita piyong nung tenla agütsür 471 aser Arogo 125 nungi parnok US sen 431,000 bendentetogo.

Christian Post den jembidang parnok sangdong ka ajanga, "Iba mapatong ya May ita tashi inyaksü, kechiyong tang tashi nung bendena aliba sen dang nungi ano taliba nungdaker, aser Arogo tila 1,200 dak temai teyari meshiogo," ta metetdaksü.

AND Campaign President, Justin Giboney-i, "Khristar temang shilem nung dena alirtemi melungsoa tenlaba atema ni pelar, ajisüaka ano America nung Arogo aikati teyari nungdaka timtemba ngua

ni mepelar," ta metetdaksü.

"Alima atema teimla aliba Tsüngrem ka onoki tenzüker, aser tang tayongzükbä ajurua aliba Arogo tilatem ajanga Pai mapa inyaker. Tangar khuret lemsatapa abentsü atema tang mapang ya asenok longjemtsü mapang ka lir," ta paisa metetdaksü.

Senotsü timtem ajanga shibangtsüsa aliba Arogotem yaritsü atema partner organization Pulse-i May 15 nü online benefit simulcast sentong tenzüka Arogotem yaritsü atema tenla bendentsü.

Iba simulcast sentong nung Lecrae, Lauren Daigle, Toby Mac aser tangar aikati shilem agia ken atentsü. Iba mapatong atema otongdar, taoba mapang NFL star, Benjamin Watson-ia iba sentong nung shilem agitsü

Pastor 190-i Virginia Governor dang tekülem sentong agitsü mepishi



May 10, 2020: Virginia nung pastor 190 dak temai temepishiba shidi ka ajanga Governor dang ketdangsertem tetuyuba ana tera melenshia hopta nung khenbosa Tenla kidang amangbapurtem adenshia tekülem sentong agitsü atema temelaba agüjang, ta mepishio; iba shidi nungji pastor ajak jagi sign asü.

Hombarnü Governor, Ralph Northam nem agütsüba shidi nungji yamai zülua lir, "Virginia nung aliba Arogotem nung pastor temi, nai nüburttem atema tesüiba ita aika kanga meranga inyakba atema nü dang pelar."

"Onoki na asoshi sarasademja arudar. Onoki iba

shidi ajanga Executive Orders 53 aser 55 na melenshia hopta nung khenbosa tekülem sentong agitsü atema temelaba agüjang ta mepishir. Onoki nüburttem timtemi maitsüsa kümdanga inyaksü," ta shidi nung shia lir.

Coronavirus tashidak prokba nokdangtsü atema March 23 nü Governor-i Executive Order 53 agütsüba sülen nungi Virginia nung Arogo aikati adenshir tekülem sentong magiteti arudar. Iba tetuyuba ajanga nisung 10 dak tema adenshiba nokdang.

Iba dak alia March 30 nü Executive Order 55 agütsü. Iba tetuyuba ajanga kima moapu aser tekülem ki naprongla nung nisung 10 dak tema adenshiba nokdang. Iba tetuyuba ya June 10 tashi mapa kuma inyaksü tuyua lir.

Michael Law Jr. (senior

pastor, Arlington Baptist Church) leniba nung pastor temi temepishiba shidi ya agütsü. Shidi nungji pastor temi online ajanga sign asü.

Pastor temi züluba shidi nungjisa, "Kibuba Yisu Khristar Arogoji tanela nung shirangbapurtem atema hospital ka lir, ajisüaka March 23 nungi tenzüka nisung ter dak tema adenshia tekülem sentong agitsü nokdang. Amangbapurtem adenshir tekülem sentong agitsüji Lai O nung shia lir aser iba ya (Khristantem longjemba) küm 2000 jungnüa Khristantem tamendakdak lir," ta shia lir.

"Sorkari kobika Khristantem telongjem nokdangdir patekaji Virginia nung alirtem tanela jenjang raksatsü, kechiyong tang ama tensa nung tanelar chiyungtsü nungdaker," ta shia parnok, iba tashidak nungi kümzüka alitsü atema sorkar telatetbatem shidak inyaksü, anungji hopta nung khenbosa adenshia tekülem sentong agitsü melaang, ta Governor dang mepishi.

ANOGO ABEN TSÜNGREM DEN

NAI AJIZÜKANG

"Kechiyong kechi koda nisung kati mangaba ajanga nisung aika temenen pur kümdaktsür, aji oda kati tashi angaba ajanga aika temeshi pur kümdaktsür" (Rom 5:19).

Tashi angaba aser mangaba agi asenok meketbanga lir, aser tashi mangaba küboki mela mela aier (Ef. 2:2). Tashi mangaba mangazüktsü asoshi lemang tajungtibaji tashi angaa shirnoki jajar parnok nungi angazüker (Kol. 3:6-8).

Tejaklen shirnok mepet tulu kübok jaja parnok nungi asenoki angazüktsü akok, Yisuji tematiba tatishitsü lir (Ibri 12:11). Pa bushitsü aser mita alitsü asoshi asenok aja (Ibri 3:1-2). Yisui tashi angabaji tetsüngdai aitba ka masü saka Pa dak aketba jakla. Pai tasü tonga tashi anga. Pa taküm tetenzük nung tatem tashi tashi angabaji pa jakla liasü. Pai Tebu dang Yordan ayong nung, tatitangba arem nung, Gethsemene Atsüki nung, Golgotha tenem nung aser ajaklen Pai tashi anga. Alima nung Pai tashi mangaba kecha nunga mangur. Khrista mulungsentsü nenok dak liang (Fil. 2:5,8). Asenoki teti tashi angadi (t.12).

Ibri 11 ji Tsüngremer Nungtuku Ki ta ajar. Ibai Tsüngrem dang tashi angar noksa agi sünga lir. Noai Tsüngrem dang tashi anga (Ibri 11:7). Abrahami Tsüngrem dang tashi anga aser pa akaba ajak toktsü (t.8). Yosefi tepuatsü anema tashi anga (t.22). Mosai jangratemtsü ajak toktsür Tsüngrem dang tashi anga (t.24). Danieli amokmeren anema Tsüngrem dang tashi anga. Nütsüngtemi rishikangshi tiyalung nung Tsüngrem dang tashi anga.

Mezüngpur tashi angabaji Laishiba nung dang Arogo otsü ajunga nung angur. Amy Carmichaeli (1867-1951) Tsüngremer tajaba nung tashi anga aser Indiai aru. William Careyi (1761-1834) Tsüngremer tajaba angaa India i aru. David Livingstonei (1813-1872) tashi anga Africa limai ao. Adoniram Judson (1788-1850) tashi anga Burma limai ao. Hudson Taylor (1832-1905) tashi anga Chinai ao. Sadhu Sundersingh (1889-1929) Osangtajung bener India ajunga nung senzü kechiaser pa nükjitongji tashi angatsüba liasü. Tashi manga asübo Mary Slessor i (1848-1915) nisung shi achirtem rongnung mapa inyaksü meshimtetla. Tsüngrem dang tashi anga Graham Staines i (1941-1999) pa taküm aser par chirtem taküm bendanga magütsüla. Tashi angaba agi tebuttsü Gladys Staines, pa arondak yutsü. Item mezüngpurtemi asenok ajungshidaktsüdi.

Oba, kü mulungjang Ne dang tashi angaba sünga alitsü Ne taochi kü nem kua. Amen.



May 08, 2020 nü Missouri nung aliba Journey Arogo tentetsang aser South Carolina nung aliba Seacoast Church nung pastor teacher, Darrin Patrick arishi küm 49 lia süogo. Pa soseta asü südi ta bilemer. 2019 küm March 27 nü Wake Forest, North Carolina nung aliba Southeastern Baptist Theological Seminary nung Darrin Patrick-i o jembidang tangokba tejen noksa ka yangi angur.

OLONG PAITEP # 5453

1			2			3			4	
			5		6		7			
8										
			9							
	10									
								11		12
			13					14		
15						16				

- | | | | |
|--|-------|-----------------------------|-------|
| TIPILEN | | LANGTSÜNGLEN | |
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. ___ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ___ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ___ a | - (3) | 9. Küm kasa purtem | - (5) |
| 13. Ajungbena temulungjang tongtonglatsü atu | - (5) | 10. Tetsüng tajemetdak | - (6) |
| 15. Tejen lai nung tesayur | - (5) | 12. _____ adenshi | - (4) |
| 16. Tsüngsak-mopung | - (5) | 14. Tsünüsenbongtsü adokdak | - (3) |

OLONG PAITEP # 5452 TELANGZÜBA

- | | |
|---|--|
| TIPILEN : | LANGTSÜNGLEN : |
| 1. Kasa, 6. Rangben, 7. Mait, | 1. Khu, 2. Süjak, 3. Onük, 4. Oba, |
| 9. Poktet, 11. Ati, 13. Atasa, 16. Rür, | 5. Anü, 6. Ratet, 7. Mozü, 8. Ita, |
| 17. Rajang, 20. Lanu, 24. Nüngjem, | 10. Tar, 12. Tinu, 14. Salem, 15. Aja, |
| 25. Süra. | 18. Anünü, 19. Tajü, 21. Ano, 22. Onü, |
| | 23. Kua. |



SOPANGBA NEMJEM KEN

O Alima teraksa tatempang putu, ozü meimchiri kechianga mesa yang kümogo, Lenden metong mependangteter, pangkashi asü tolangshi majiteter, Aha! mersü mashi, Saka o kanga tashi, keroseni mi remsepba putu, aueri kibur artsüba putu, chirnuri tsürabur ajemshiba putu, An tetsüi tepong arishiba putu, shidakbai teyazü dang tatok meshiba putu ka nung litarni, pongmang Lima alieri kodangang saksü yongyar, tangar Tsüngrem külemer, Molung chia tekülemki mangu kümogoni, Meimchir aika meshimetsür kuma lirko yongjia takari teka mesalar, Jen Melapoker, asükwa tsüngen ama kima atsü tar tangtsüang tuluba yokshir telongi yiatok, Adianu tali sempateper pelatepa salemtsübo pongmang, Takar o tulurna nguteper, tashir o temetetera tongteper, sensaker o tilarna sensaksem nung kechi ajangzüksüaka? Anü longtenaka, Anü Ita petinutem tam tam ta tsükaka, Alimaji anüka raksaka metsüputsüsa tensa kati arudarkoti, kokrapangla tensa tia tanaben shilua arulasang ta Teyanglur soba Tiabai angashidisü ta lba nemjem ken atener!! Nübur ola angashiangma amen. Lilir :I. Kilang, Ajem, Indisen, Dimapur.

TANÜBO NAI LANGZÜANG

Q. Phytopharmaceutical mozü ya koba nungi agizüka yanglur?
 A. Fish B. Pangolin C. Plants D. Oil
 _____ (Taruba adok nung onoki langzüksü)
YASHI ADOK TELANGZÜBA : 78

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiriyim@gmail.com nung yokang mesüra Tir Yimyim bureau tem nung agüjang.

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

FOOTBALL NUNG JENJANG TULU AKETBA TROPHY TEM:

- FIFA World Cup trophy.
 - Football Association Challenge Cup.
 - FA Community Shield.
 - UEFA Champions League trophy.
 - Copa America.
 - English Premier League.
 - La Liga cup.
 - Coppa Campioni D'Italia.
 - Deutsche Meisterschale.
- *Nija Sempet**
- Ballon d'Or.
 - European Golden Boot.
 - Premier League Golden Glove.

SUDOKU # 5495 TELANGZUBA # 5494

				6	3		9	8	5	9	1	6	2	4	7	8	3
9				7	4	1		5	3	6	4	9	8	7	2	5	1
					9				7	8	2	3	5	1	6	9	4
	2		1	4			6	3	1	2	3	5	7	8	4	6	9
8	1					2			4	5	8	1	9	6	3	7	2
	6		7		2				9	7	6	4	3	2	5	1	8
		3					1	2	6	4	7	8	1	3	9	2	5
		5	4			6	7		2	1	9	7	4	5	8	3	6
			9	2		8	3	4	8	3	5	2	6	9	1	4	7

OJANG LUTEP # 5043

- ENKH : □□□□
 PTSELAÜ : □□□□□□□□
 EMATA : □□□□□□
 AKINYDANG : □□□□□□□□□□
 NIBUNGO : □□□□□□□□
 TITE : □□□□
 LAPE : □□□□
 TSALIÜ : □□□□□□
 MANGERA : □□□□□□□□
 AKAINYNG : □□□□□□□□

OJANG LUTEP TELANGZÜBA # 5042

KECHISARENA AJAK ABENSA DANG AGINÜRA TAKÜM NUNG KODANGA PERIA MALITSÜ

TAN HOPTA ATEMA - KOMA SÜLA ?

Q. Tashidak nokdangtsü atema taruba June ita tashi Assam nungi jangotsü aser gari totzü abenba garitem kata Nagaland-i matudaktsui nokdang nunga koma süla?



New Delhi, May 10, 2020: Coronavirus tashidak anema linük tesem ajak shibanga aliba mapang Amongnü Delhi Chief Minister, Arvind Kejriwal-i video conferencing ajanga osangbenertem den jembiba noksa nung angur. Delhi sorkari Rajiv Gandhi Super Speciality Hospital nung coronavirus agi shirangertem dang yaritsü ta sangdongogo.

Tanü PM Modi-i rongsenkettsüing atema CMs den o lemteptsü

New Delhi, Monupii/May 10 (Agencies): Coronavirus tashidak prokba nokdangtsü atema India linük shibanga aliba agienba sülen linük nung rongsenkettsüing jenjang asentenshitsu atema Hombarkonongdang Ato kilonser, Narendra Modi-i video conferencing ajanga state balala nungi chief minister tem den o lemteptsü, ta Centre sorkar osang ka ajanga metetdaksü.

India nung novel coronavirus tashidak prok tenzükba sülen Ato kilonser, Modi-i chief minister tem den senden pezüben tashi menogo, aser Hombarkonongdang senden pongububa asütsü, ta Prime Minister's Office (PMO) ajanga metetdaksü.

PMO-i, Hombarkonongdang 3:00 ako nungi Ato kilonseri video conference ajanga chief minister tem den senden amentsü, ta metetdaksü.

Sorkar osang ajanga ashiba agi, iba senden nungji linük rongsenkettsüing dak sendakba maparen ajak asentenshitsu aser linük nung 'red' zones agi 'orange' mesüra 'green' zones akümtsü atema kanga meranga inyaktüsü asoshi jembitsü.

April 27 nü Ato kilonseri chief minister tem den senden amenba sülen coronavirus tashidak anasü agi tali kümogo. April 27 nü tashi nung India nung nisung 28,000 dak tema dak coronavirus tashidak puteta liasü ajisüaka tangbo nisung 63,000 jungnüa dak coronavirus tashidak putetogo.

Ato kilonseri Chief Minister tem den senden amenba sülen anogo ishika tsüingda Central sorkari ano hopta ana linük shibangtsü telemtetba agia liasü. Ajisüaka rongsenkettsüing dak sendakba tenokdangbatembo kar agienogo.

Coronavirus tashidak prokba

nokdangtsü atema March 25 nungi tenzükba India linük tang tashi shibanga lir. Tawa state karibo industrail mapa tenzüktsü atema labour oziungtem kar agienogo.

Hombarkonongdang senden nungsa linük shibanga agientsü atema ano tenokdangba kar agientsüa akok, ajisüaka khenyongibosa tenokdangba ajakbo magientsü, ta osang angazüker.

Amongnü senden ka nung state balala nungi chief secretaries-i Cabinet Secretary, Rajiv Gauba dang, coronavirus tashidak nungi kümzüka alitsüji tongtibang, ajisüaka tanem-tanemi rongsenkettsüing maparena tenzüktsü nungdak, ta shiogo.

India tesem balala nung aayangertem special trains ajanga peipei state bushia odor, anungji linük nung industrial maparen asentenshia tenzüktsüji state tem atema tayongzüka ka asütsü.

India-i linük pongu nem medical teyari agütsür

New Delhi, May 10 (Agencies): Coronavirus tashidak anema raratsü atema linük kari teyari meshiba nung ajemdaker India-i Maldives, Mauritius, Madagascar, Comoros aser Seychelles linüktem nem medical teyari agütsüogo.

Ministry of external affairs (MEA)-i, India nung navy rong- Kesari nung medical teams, nungdakba mozü balala aser chiyungtsü bentsür linük pongui yokogo, aser ibaji India-i region nung teyari agütsüba maparen ka lir, ta metetdaksü.

"Coronavirus tashidak anema parnokki teyari meshiba nung ajemdaker India-i Indian Naval

Ship Kesari ji- Maldives, Mauritius, Madagascar, Comoros aser Seychelles linüktemi apusoa yokogo; rong nungji medical assistance team ana, Covid dak sendakba nungdak mozütem aser chiyungtsü densema lir," ta MEA-i sangdong ka nung metetdaksü.

MEA-isa, "Medical assistance team anaji ka Mauritius aser ka Comoros linüki oa item sorkari coronavirus anema raraba nung yaritsü. Comoros dangi yokba team jagibo dengue wara anema raraba nunga yaritsü," ta metetdaksü.

"Iba rong jagi Covid-19 dak

sendakba mozütem Mauritius, Madagascar, Comoros aser Seychelles nem agütsütsü aser Maldives nem chiyungtsü ton 600 shi agütsütsü," ta MEA-i metetdaksü. Iba dak alia India-i Mauritius linük nem Ayurvedic mozü balala bener yokogo.

"Madagascar aser Comoros na nem bener yokba mozütem rongnung Hydroxychloroquine tablets densema lir. Iba mozü ya tamalen Mauritius, Maldives aser Seychelles nembo agütsüogo," ta MEA-i metetdaksü.

Navy rong ya tembar linüktem yaritsü atema India nung 'Mission Sagar' kübok yok.

Tesüiba ghonda 24 nung states/UTs 10 nung Covid-19 Case maliasü

New Delhi, May 10 (Agencies): Amongnü Union Health Minister, Harsh Vardhan-i, tesüiba ghonda 24 tsüingda States aser Union Territories 10 nung nisung ka dak danga coronavirus tashidak meputet, ta metetdaksü.

Amongnü linük yimtiba, Delhi kübok Mandioli area nung COVID care centre ka semdangba sülen osangbenertem den jembidang Union Minister-i, "Tesüiba ghonda 24 tsüingda States aser Union Territories 10 nungbo nisung ka dak danga coronavirus tashidak meputet.

Central sorkari tang tashi nung state tem nem N95 masks lakh 72 aser personal protective equipment (PPEs) lakh 36 agütsüogo," ta metetdaksü.

Union Health Minister-isa,

States/Union Territories pezü nungbo shinga dak-a coronavirus tashidak meputet, ta metetdaksü.

Dr Vardhan-i, linük nung COVID-19 care centres 4,362 lir aser item nungji coronavirus tashidak temaitsü keta alir 3,46,856 tashi yutettsü, ta metetdaksü.

India nung tang tashi nung nisung 62,939 dak coronavirus tashidak putetogo, iba nungjagi nisung 19,358 bo anepadokogo aser nisung 2,109 bo süogo, ta Union Health Ministry osang ka ajanga metetdaksü.

Tesüiba ghonda 24 tsüingda India nung nisung 127 novel coronavirus tashidak agi süogo aser iba tashidak agi asürtem ajak agi 2,109 jungogo, ta Health Ministry-isa metetdaksü.



New Delhi, May 10, 2020: Amongnü New Delhi nung yipru agi police check post ka raksatsüba sülen police-i iba tesemji reprangdangba noksa nung angur.

Maldives nungi Navy rong nung India nung 698 anir aruogo

New Delhi, May 10 (Agencies): Indian Navy rong-INS Jalashwa nung Maldives nungi India nung 698 anir arua Amongnü anepdang Cochin Port tonga aruogo.

Port Trust-i sangdong ka ajanga, "Maldives nungi mezüngbuba telok nung nisung 698 Amongnü anepdang 9:30 ako nung Cochin Port tonga aruogo; parnokki Indian Navy indang 'INS Jalashwa' rong nung anir aru," ta metetdaksü.

Tanep India tonga anir arurtemji tebur 595 aser tetsür 103 liasü. Parnok rongnung arishi küm 10 den tekübok tanur 14 aser mashisa 19 densema lir.

Passengers timbaka Kerala aser Tamil Nadu na nungi liasü, aser states/UTs 18 nungia liasü. Rongji Hokolbar aonung Male nungi apusoa liasü.

Inspector-General of Police, Vijay Sakhare-i, parnok ajak quarantine asütsü atema achayangogo; parok rongnung Kerala nung 440 lir aser tangartemji linük tesem balala nungi lir, ta metetdaksü.

Tangartemji Lakshwadeep nungi 4, Tamil Nadu nungi 187, Telangana nungi 9, Andhra Pradesh nungi 8, Karnataka nungi 8, Haryana, Himachal Pradesh, Maharashtra, Rajasthan shia nungi asemsem,

Goa aser Assam na nungi kaka liasü.

Uttarakhand nungia nisung tenet, West Bengal nungi trok, Delhi nungi pezü, Puducherry nungi asem, Uttar Pradesh, Madhya Pradesh aser Jharkhand shia nungi nisung anana densema liasü.

Coronavirus tashidak temaitsü keta alirtem tama rong nungi aludaktsü, iba sülen district sasep nung rong nungjagi aludaktsü, ta Port Trust nungi ketdangser kati metetdaksü.

Bendanglen nungi rong ajanga India tonga arurtem dak Port Health Organisation-i Thermal screening agir. Iba dak alia Terminal nung Customs & Immigration inyakyima benshir.

Thermal nung Port Trust-i khu nung mozü aintsü atema facilities aser angati wi-fi agütsür.

Ano bendanglen nungi arurtem hospitals, institutional quarantine centres-i aotsü aser home quarantine atema state sorkari ambulance, state transport bus aser taxi achayangtsür, ta ketdangserisa metetdaksü.

Iba maparen nung state sorkar den District Administration, Police aser Health Departments-i yaritepa inyaker.



Jalandhar, May 10, 2020: Amongnü Jalandhar nung peipei yimtsüing onertem tenung agütsütsü adenshiba mapang nung aayangertemi social distancing anema inyakba atema police-i nokdangba noksa nung angur.

Northeast China nung COVID-19 tali puteter



Beijing, Monupii/May 10 (Agencies): China northeast tsütsü Jilin province kübok yimti ka zone system tematiba nung yutsüogo, aser yangji coronavirus tashidak tanaben tenzükshitsü südi, ta China ketdangsertemi Deobarnü ashi.

May 9 nü Shulan nung nisung tasen 11 dak COVID-19 tashidak jangjatet, aser parnok ajak ya kibong ka nungi mesüra iba kibong nungi tetsür ka den ajurutepa alirtem südi ta ashir.

Shulan nung virus aziüoktsü asoshi tenokdangba agüja aliba tali tesashiba kümdaktsü, kong nisung aliba ki ka kima shibangtsü, menügdakba nung senzüsempogba aser kaket

reju ka melapokdaksüi nokdang, ta Jilin sorkari ashi.

Iba ajanga mainland China nung May 9 tashinung nisung tasen 14 dak coronavirus puteta lir, ta National Health Commission ajanga Deobarnü ashi, koba April 28 sülen timtiba alitsü.

Item rongnung central Hubei province kübok Wuhan yimti nunga ita ka dak tema lir mezüing putet, kong iba tashidak mezüingbuba taoba küm tatemlen jangjateta liasü.

China linük tesem ajanga 'low-risk' ta Brehostibarnü sangdonga liasü, saka nisung 14 dak putetba ajanga Bodhbarnü nisung ka dak puteta aliba nungi aoksa timba aküm.

Jilin dak alaka northeaster province, Heilongjiang indang yimtiba, Harbin nunga nisung ka dak putet.

Arishi küm 70 tain ka April 9 nungi mozüki nung quarantine süa aru aser tenetben tashi tendangba nung meputet saka May 9 nü iba nisung dak coronavirus putet, ta Heilongjiang health commission-i Deobarnü ashi.

Anasa aliba Liaoning province yimtiba, Shenyang nunga Deobarnü arishi küm 23 tain nisung ka dak coronavirus putet, shiba May 5 nü Jilin nungi Shenyang-i arua liasü.

Ano maneni China nung nisung aika dak iba tashidak aliba yimyatem mejangjateti alitsü südi, ta tsübuteper. Aser item nisungtem indang contact tracing aser health check ajanga timba puteter.

Mainland China nung May 9 tashinung coronavirus agi nisung 82,901 menepa lir aser nisung 4,633 süogo, ta National Health Commission ajanga ashi.

Kenya nunger teyari agütsüba tayimtsü ya Ethiopia-i khazüka yok

Monupii/May 10, 2020 (Agencies): Hopta tetenzüklen Somalia nung Kenya nunger nija meyong tayimtsü ka khazüka yokba ya Ethiopia-i Honibarnü nangzük, kong tayimtsü nung mena alir par trok prong asü.

Hombarnü iba tayimtsü ya Somalia southwestern tsütsü Bardale jila nung camp ka anükba Ethiopian sepaitemi khazüka yok, ta Ethiopian army ajanga African Union dang sangdong ka nung ashi.

Iba tayimtsü nung coronavirus tashidak prokshiba den raratsü asoshi medical supply aser osettsüset balala bener lia Somalia yimtiba, Mogadishu nungi kilometer 300 shi pilar Bardale nung tsükok.

Ethiopian sepaitemi iba tasyimtsü ya "potential suicide mission" ka liasü ta amang, kechiaser mapang masüdag tayimtsü aruba osang parnok nem memetetdaksü aser tayimtsü ya ali nungi kangabo mepilai yima liasü, ta sangdong nung shia lir.

"Osangtsüsang aser jelia tekümdangtsü inyakyim peria maliba ajanga tayimtsü ya

khazüka yok. Iba tatalokba indang tali tejangjaba metettsü asoshi Somalia, Ethiopia aser Kenya nungi tangatetep nung bushisüngdangtsü nüngdaker," ta mitkartemi ashi.

Iba lendong atalokba atema hopta tetenzüklen Kenya-i aoksaba lemsatetep aser iba tayimtsü ya Somalia nung coronavirus tashidak wara den raratsü atema osettsüset bener aorba liasü, ta ashi.

Al-Shabab telungpur den raratsü asoshi African Union peacekeeping mission nung shilem ka ama Somalia nung Ethiopia aser Kenya sepaitem yoka lir.

Kenya aser Somalia na tsüingda tesendaktep mejungi aliba mapang ka nung iba tayimtsü ya khazüka yoker.

Taoba ita Somalia-i arrtsü alema arua Mendera anasa jelia osang magütsüi amak aser ibai rara ayongba maparen ka lir, ta Kenya-i aitsür.

Külem Somalia-i par linük telungzük inyakyim nung kidanger Kenya yagi shilem agir, ta mapang talangka nungi aija arur, koba Kenya-ibo magizük.

Alima nung coronavirus agi nisung 279,000 dak tema süogo

Monupii/May 10, 2020 (Agencies): Alima nung COVID-19 tashidak wara agi nisung 279,000 dak tema taküm samatsüogo aser nisung million pezü dak tema iba tashidak agi menepa lir. Kasa mapang nisung million 1.3 dak tema taneptsü nguogo.

Spain nung coronavirus agi anogoshi nisung asüba ajema akümer aser Honibarnü 179 liasü aser Deobarnü 143 asü, ta health ministry ajanga ashi.

March ita tiyongtsü ka nungi asadangyonga aruba nung tang tajemba asür.

Ajak senteper Spain nung Honibarnü tashinung nisung 26,478 sür liasü aser Deobarnü tashinung nisung asür 26,621 jungogo, aser kasa mapang iba tashidak nisung 223,578 dak puteta aliba nungi 224,390 jungogo, ta ministry ajangasa ashi.

Philippines health ministry-ia par linük nung nisung tasen 184 dak coronavirus putetba shiogo, aser iba Southeast Asia linük nung ya nisung 10,794 dak iba virus jangjateta lir.

COVID-19 tashidak agi nisung tali 15 süa tang iba linük nung nisung 719 süogo aser kasa mapang nisung 82 taneptsü ngua tang linük nung nisung 1,924 taneptsü ngur lir.

Deobarnü Moscow nung coronavirus agi menepa shiranger anepaluba mozüki ka nung mi adoka nisung ka asü aser nisung 200 shi iba mozüki nungi anizüktsüsa aküm.

Iba yimti north tsütsü mi



adokba ya remseptetogo, ta osang ajanga ashir.

Iba lendong nung shiranger ka asü, ta Mayor Sergei Sobyanin-i ashi aser tanüingba shirangertem ya danga mozüki temi belener aotsü ta metetdaksü. Saka iba mozüki nung nisung kwi COVID-19 agi shiranga aliar ano memeteter. Tesüiba ghonda 24 tsüingda linük nung nisung tasen 11,012 dak coronavirus tashidak puteta tang linük nung iba tashidak agi nisung 209,688 menepa lir, ta Russia ketdangsertemi Deobarnü ashi.

Russia indang coronavirus task force ajanga ashiba agi, tesüiba anogo nung nisung 88 asü aser tang tashinung iba tashidak agi asür ajak senteper nisung 1,915 lir.

Alima nung coronavirus tashidak nisung timtiba dak putetba linüktem rongnung Russia ya jenjang pongububa nung lir, kobai France aser Germany ajatet.

Australia nung nütsüing yongsük timtiba aliba state,

kong Sydney lir, iba state nung restaurant, playground aser outdoor pools tem Hokulbarnü nungi tanaben lapoktsü, kong kanga sashia tendangba mapang coronavirus tashidak prokshia aoba kanga ajema akümba sayur, ta New South Wales state premier Gladys Berejiklian-i ashi.

Australia linük nung coronavirus agi iba state nung tamajungtiba kongshi, aser linük nung iba tashidak jangjatetba aser iba tashidak agi asür shilem 45 bo iba state nungi lir.

Saka Honibarnü nisung 10,000 dak tendangba nungi nisung ana dak dang iba tashidak putet.

Malaysia sorkari June 9 tashi nüburtem senzüsempogba aser business tem nokdangtsü, ajisüaka linük rongsenketsüing lenmangtem karbo lapokogo.

Hopta tetenzüklen business tem akhi ama lapokdaksü saka health totuyuba tesashi agüja liasü, koba ita ana shibanga

tesem mashi nung, nisung aika alidak kasa tensa ya ajurutsü, ta sayur," ta pai Seoul indang nightclub tem athishia ashi.

"Asenoki iba tashidak wara nungi nokdanga alitsü asoshi maneni saksalemtsüla."

Tesüiba ghonda 24 tsüingda South Korea nung nisung tasen 34 dak COVID-19 putet, aser parnok ya nightclub-i aortem den sendaktepa lir.

Korea Centers for Disease Control and Prevention ajanga ashiba agim parnok nisung 34 nungi nisung 26 ya pei aliba tesem nung menaba aser tanüingba ya dangalen nungi menar aruba ta asadangteter.

White House indang coronavirus taskforce nung züingsem tejangja, Dr Anthony Fauci ya pasasa anempong tenzükogo, shibai COVID-19 tashidak puteter kar den iba tashidak meputet dang ajurutepa liasü.

US National Institute of Allergy and Infectious Diseases director dak COVID-19 meputet aser pa dak maneni tendangtsü.

Kasa mapang Centers for Disease Control and Prevention indang director Robert Redfield ya White House nung iba tashidak keta alir ka den Bodhbarnü ajurutepba sülen taruba hopta ana kidang nungi mapa inyaktüsü.

Kasaji Stephen Hahn, US Food and Drug Administration commissioner ya pasasa hopta ana anempongtsü tenzükogo.

"Tang tesüsa entertainment facility balala nung iba tashidak putetba yagi mashi mapang,

DRDO-i UVC sanitation cabinet DRUVS yangluogo



Kohima, Monupii/May 10, 2020: DRDO aser RCI longjemer yangluba DRUVS Cabinet aser Automated UVC NOTESCLEAN yangi noksa nung angur.

Kohima, Monupii/May 10, 2020 (TYO): Hyderabad yimti nung amenoka aliba Defence Research & Development (DRDO) lab aser Research Centre Imarat (RCI) nati Defence Research Ultraviolet Sanitiser (DRUVS) ta nungja agütsüba automated contactless UVC sanitisation cabinet yanglua liasü, ta PRO (Defence) sangdong ajanga Lt Col Sumit K Sharma-i metetdaksü.

UVC device ana ya electronic gadget talisa mobile phone, iPad, laptop aser sen (currency note), cheque leaf, challan, passbook, paper den envelope sanitise asütsü atema yanglu.

DRUVS cabinet ya 'contactless operation' device ka lir, koba ajanga coronavirus wara prokshiba azüoktsü asoshi tongtibang shilem agir.

DRUVS nung proximity sensor switch tem den shibanga aser lapoktetba drawer keta lir, koba automatic agi achaayangtsür.

Tekalen agüja aliba electronic device aser bank dak sendakba kakat aser card tem iba cabinet telung nung enoktsüba mapang, UVC agi 360 degree ayimjema kongshia sanitise sütsür. Sanitisation maparen ya atemba sülen, DRUVS system ya pa sasa 'sleep mode' agi melener, koba device shibangtsü asoshi iba

machine anasa nisung noktaka mesüra atatsü menügdaker.

Maneni, RCI-ia NOTESCLEAN ta nungja agütsüba automated UVC currency sanitising device ka yangluogo.

DRUVS amshia sen lep aika sanitise sütetet, ajisüiaka sen ka ka sanitise asütsüji mapang kanga agitsü asünung, iba maparen atema sanitising device - NOTESCLEAN yanglua liasü, kong device indang slot nung senji enoktsütsüla. Iba mapang device yagi sen note temji ka khen ka khen ta UVC lamp balala ajanga süia odaktsür aser sanitise sütsür, ta kasa sangdong ajanga metetdaksüogo.

Changtongya temeket nung teinyaktsü kar lateter

Dimapur, Monupii/May 10, 2020 (TYO): Akhoya aser Changtongya Village Council den ward union aser Changtongya Town Telongjem senden ka Honibarnü menogo.

COVID-19 wara nungi nüburtem kümzüka yutsütsü nükjidong nung Changtongya jila aser Yimnasanger Yimsüsürtem longjemer temzüng takang kar yanglua nüburtem dang May 9, 2020 anogo nungi mapa küma aotsü asoshi parnoki sangdong ka ajanga metetdaksü.

Tanü nungi tensa süngjema maküm tashi Nagaland adena orr alir Non-Local shinga Town-

i arutsü memelar. Changtongya, Akhoya aser Changtongya town chirnurtem, nüburtem aser senso shirsa Nagaland adena orr tanga state nung lir parnokji kidangi shilangnüra anogo 21pei atep sasep nung quarantine agir ang kidangi anioktsü. Ajisüiaka Sorkar ajanga agütsüba tetuyuba nung anogo 21 quarantine nung amongertem asoshibo iba temzüng agi malener, ta parnoki ashi.

Tanü nungi mapang tatsüka asoshi Assam nungi nüngdakba osettsüset bener atuba dak alaka kecha oset bener atutsü memelar. Changtongya Town

telongzüik nung aser yim ana litsü nung nüburtem pilar senzüsebongtsü aser inyaksangshitsü melar, ta parnokisa tetuyuba agütsüogo.

Maneni Changtongya town telongzüik nung kiyong sema yokya-yokjiba ajak meshimeshia nokdangar.

Tanü, May 9, 2020 anogo nungi iba temzüng nübur mechi tashidak nungi kümzüka ayutsü atema lateta yutsüba nung nüburtemi tashi anga-a anidaktsü züngzünga doktsür. Tashi mangartem temzüng agi alentsü, ta parnokisa metetdaksü.



Hokolbar aser Honibar nü Tuensang NST Station nungi Kohima/Dimapur/Mokokchung/ Noklak aser Shamator Sub-Division tesemi yoktsü asoshi Sorkar ajanga achaayanga aser anepaluba NST bus den nija bus nung Tuensang District nungi lisopurtem pei pei talidaki ayamesoa aotsü asoshi bus-i ayaketa atudang tangokba noksa ka yangi angur. (Tuensang, May 10, 2020)

SÜR KÜM 25 AJUNGER ASÜR. AKANGYANGER AIER (11.05.1995 - 11.05.2020)

Ochishir bilemtetbaji temoatsü ka; saka tamashi tenüngji shizüka aotsü. Apijemtsü 10:7

Meimchir tenzüka mapa inyaker tasütait ka, tim lenmang nung shidak dang inyakba ajanga nai nisung aika ajungmesoogo.



Akümlü piyong nü den liyonga arudang onok kanga tia taka ama züngshio, kechiyong kinungbu ka, tebu ka aser tebou ka ama nü akhümdong nung onok len ania aruba tu temoatsü ama onoki züngshir. Nü mapa tajungtem ajanga tanü tashi onok maneni ajungmesor. Onoki na kanga menungrar aser onok taküm nung kanga tongtibang asütsü.

Kümtem süia aruba mapang piyong Tsüngremi len ania aser temoatsüma nung anir aruba atema Pa nem tenüngsang agütsür.

-Temeim, Kinungtsü S. Alemla, Chirnurtem, Anük-Apang aser Semchirsemmurtem.

AR-i Chenloiso nung sensakem sentong ka ayongzüik



Tuensang, Monupii/May 10, 2020 (TYO): HQ IGAR jembishinüa liasü. Iba tesem (Chenloiso) nung yimjung aser tesünep lidaktsütsü asoshi shisa-obang ka sür telongjem ajanga security force aser yimertem tsüngda tesendaktep takhangba yanglutsü asoshi jembü.

Maneni, yimertem metokmeperiba mesüra timtem balala nung nungita yaritsü aser yimtsüng nung yimjung den tesünep lidaktsütsü asoshi parnoki mera tajungtem agia inyaktsü, ta Tuensang onüktem talisa terenlok Battalion-isa nangzüka liasü, ta maparen, shisaliok aser women kasa sangdong ajanga empowerment indang nunga metetdaksü.

Empowered Group senden agitsü

Dimapur, Monupii/May 10, 2020 (TYO): Lockdown Anungji, iba senden nung meyipa aruba/shilangba District Education Officer, maparen dak sendakba nung Dimapur, All Nagaland jembishinütsü atema Bank Private College Association Colony, Dimapur kübok nungi züngsem asem, All Commissioner indang Rest Nagaland Private School House nung Hombar (11.05. Association nungi züngsem 2020) anepdang 11:00 ako asem aser Accommodation nungi tenzüka senden ka Community nungi züngsem agitsü, ta sangdong ajanga ana aruagi adentsü asoshi Secretary, F&CS aser mepishir, ta kasa sangdong Member, Empowered Group ajanga metetdaksüogo.

Saisapong tenzükshitsü asoshi sentong yangludat: Rijiju



Monupii/May 10, 2020 (Agencies): Union Minister of State for Youth Affairs and Sports Kiren Rijiju-i ashiba agi, coronavirus wara süitemba sülen asayartem asaya tenzükshitsü asoshi ketdangsertemi sentong tapet yangludat.

Rijiju-i, Aaj Tak dang ashiba agi, coronavirus ajanga ajak melenshitsuogo aser saisapong ajak yimya tasen benoka tenzükshitsü nungdaker. Paisa, stadium nung terprangertem

meleika saisapongtem rebrangtsü asoshi jangradema kümdaktsütsü atema sentong yanglutsü nungdaker, ta ashi.

Asayartemi pei kidang osettsüt peria meliaka takokba tashi training agia aruba atema pai parnok nem tenüngsang agütsü. Coronavirus tashidak pokteter linük ajunga mokdanga ayuba ajanga asayartem aika joko mapang tatsüka training agiba tesemtem nung training magiteti arudar.

Minister-isa asayartem aser

coach tem nem tangazükba balala agütsütsü asoshi online session agia arudar ta metetdaksü.

Pai ashiba agi, linük mokdanga aliba lapokba sülen National Institute of Sports Patiala, Delhi's IG stadium, SAI centres aser tanga sports centres tongtibangtem ajak training atema lapoktsütsü. Training agitsü asoshi Tokyo Olympics atema qualify sür alirtem mesera Olympic qualifiers nung shilem agitsü asoshi renemshirtem nem tama maongka agütsütsü.

Paisa, iba tashidak den raratsü asoshi asayartemi tenla tajung agütsüba den maparen balala nung teyari agütsüba atema parnok nem tenüngsang agütsü.

Asayartemi aikati sen, chiyongtsü aser tanga tenüngsangba osettsüt balala timtem nung aliba purtem nem tenla agütsüogo. Asayartemisa iba tashidak dak sendakba nung parnok indang social media account ajanga nüburtem nem tangazükba balala agütsü arudar.

Samuel Umtiti tetsüng yiru

Monupii/May 10, 2020 (Agencies): Coronavirus virus tashidak ayimsünga prokshiba ajanga asaya anena atar Barcelona pur traning tenzükshiba sülen tanabuba session nung France nung defender Samuel Umtiti temola yiruogo, ta Barca puri Honibarnü metetdaksü.

Barca sangdong ka ajanga ashiba agi, Honibarnü club indang Joan Gamper facility nung jurila training session agiba mapang Umtiti tetsüng tachichilen temola yiru, ajisüaka arishi küm 26 asayar ya mapang kobika masayatetsü iba indang osang tejangjabo parnoki magütsü.

Spanish media sangdong balala ajanga ashiba agi, pa hopta ana mesera asembosa masayatetsü, anungji June 20 nü Spain nung football asaya tenzükshiba mapang tashi nungang pa meyipa arur asayatetsü akok.

2016 küm Euro final nung France team nem teyari tulu agütsüba sülen arishi küm 26 tain Umtiti ya 2016 küm Lyon nung Barca nung arua aden. Iba sülen maneni 2018 World Cup

campaign nunga pai France team nungi shilem tajung agia takok tulu ngutetogo.

March ita asaya anena mata tsüngda pa iba season nung Barca nungi 16 ben asayaogo aser taoba küm asayamung tetenzüklen September aser November tsüngda pa anaben tashi yiruba ajanga asaya 10 tashi nung masayatetsüsa aküm.

Spain nung nisung 26,0000 dak tema tepsetba mesen den raratsü asoshi linük ajunga mokdanga ayuba ajanga Barca pur ita ana shi masayai lir Hokolbarnü nungi club indang facility nung training agi tenzükogo.

Taoba hopta sorkari professional asayartem quarantine tembangtsütsü asoshi sentong lir ta sangdongba sülen Spain nung football asayartem training agi tenzükogo.

June ita nungi tenzük stadium shibanga yur 2019-20 season tembanga asayatsü asoshi La Liga timla lir aser asayartem jurila training agi tenzükba ya iba nükjidong ataloktsü asoshi mezüngbuba jenjang asütsü.

Olympic Archery Qualification taruba küm June ita asayatsü

Monupii/May 10, 2020 (Agencies): India tetsür archery team atema taruba küm June ita Paris stage ya Tokyo 2021 Olympics atema full quota angutsü asoshi tatembangbuba maongka asütsü.

Taruba küm Olympics asoshi tang tashi nung India tebur team-i quota ajak ngutetogo aser tetsürtem rongnungi jurila jenjang ka nguteta lir. Iba asayamung ya 2020 küm asayatsü liasü saka COVID-19 tashidak alima ajunga sünga prokshiba sülen taruba küm

asayatsü asoshi thinenogo.

Tatembangbuba qualification ya taküm World Cup Berlin stage mapang agitsü lateter liasü saka inyakyim ajak küm ka agi thinenogo, ta World Archery-i parnok indang updated criteria list nung sangdonga liasü.

National Olympic Committees tem atema final qualifier dak alaker asaya ajak nung jenjang nguteter aliba indang jangjashitsü asoshi tatembangbuba anogoji 2021, June 1 asütsü aser

tatembangbuba qualifier ya 2021 küm June ita 2 nü asayatsü lateta lir.

Olympic Games atema entry deadline taruba küm June 5 tashi atsülangtsüogo. Asayartemi minimum qualifying scores akhatsü asoshi 2021 küm June ita 28 tashi mapang atsülangtsüogo, ajisüaka iba mapang tatakzük nung April 1 nungi June 30, 2020 densema mali.

Maneni tripartite invitations atema application benoktsüba tatembangbuba anogo dena atsülangtsüogo.

Deswal & Rudranksh nati asaya akok



Yashaswini Singh Deswal aser Rudranksh Patil na noksa

Monupii/May 10, 2020 (Agencies): Tokyo Olympics quota ngur alisang Yashaswini Singh Deswal aser lanur asayar Rudranksh Patil nati Honibarnü tasembuba International Online Shooting Championship 10m air rifle aser 10m air pistol event nung temaba jenjang ngutetogo.

Maharashtra nungi asayar Rudranksh-i 10m air rifle event akok aser pai point 252.9 nguteta world record tasen ka yanglu, ajisüaka International Shooting Sport Federation (ISSF)-i iba ya mezüngshitsü, kechiyong iba ya parnoki achaayangba asayamung ka masü.

Kasa mapang nung India nung asayarsa Yash Vardhani point 250.8 nguteta tanabuba jenjang angu aser France nung Etienne Germond (228.5) tasembuba jenjang nung

tembang.

10m air pistol final nung Yashaswini point 243.8 nguteta temaba jenjang ngutetogo. Pai taoba küm Rio de Janeiro nung World Cup asayaba mapang gold medal angu aser Olympics nung asayatsü asoshi maongka nguteta liasü.

ISSF World Cup, Commonwealth Games aser Youth Olympics nung medal ngur aliba asayar Gaurav Rana aser Manu Bhaker nati point 240.6 aser 218.3 nguteta tanabuba aser tasembuba jenjang nung tembang. Iba asaya nung temaba jenjang asemprongla India nung asayartemi dang nguteta liasü.

Iba asayamung tasembuba nung asayartem pei aliba tesem nungi Zoom platform-i login asü aser pei kidang renma aliba electronic targets tem nung kashishia liasü.

Pathan & Raina nati India nung asayartem bendanger T20 leagues tem nung asayadaktsütsü pusema jembu

Monupii/May 10, 2020 (Agencies): Suresh Raina aser taoba mapang all-rounder Irfan Pathan nati India nung asayartem shirnok national team nung shimtsü asoshi tebilemba mali, item asayartem ya bendanger T20 league tem nung asayadaktsütsü asoshi pusema jembuogo.

"BCCI-i, ICC mesera franchises tem den sensaksema India nung asayartem bendanger league tem nung asayadaktsütsü asoshi sentong yanglu nung ajungtsü ta bilemer. League balala ana nung danga asayatsü asoshi onok nem temelaba agüjang," ta Raina-i Instagram Live session ka nung ashi.

"Bendanger league ka nung onoki junga asayatetra aji onok asoshi tajung asütsü. International asayartem item league tem nung asayaba sülen pei national team nung tanaben



arua asayar," ta paisa ashi.

Irfan, shiba lenisüba kübok iba session agia liasü, paia iba tebilemba pusema jembuogo aser ashiba agi, asayartem shirnok team nung anioxtsü asoshi tebilemba mali, item asayartem yabo bendanger T20 leagues tem nung asayatsü asoshi temelaba agütsütsü.

"Linük balala nung tebilemba balala lir. Michael Hussey arishi küm 29 asüdang Australia team nungi asaya tenzük, India nung asayar ka küm 30 asüba

mapang nung kodanga India team nungi masayatetsü. Nai dang junga asayatetra linük asoshi asayatsü atema shimtsü," ta Irfan-i ashi, shibai taküm January ita cricket asaya tapu ajak nungi anenba sangdongogo.

"Asayar shirnok arishi küm 30 jungogo aser international asaya nung shilem agidaktsütsü asoshi tebilemba mali, item asayartem ya bendanger league tem nung asayadaktsütsü shidanger," ta paisa ashi.

BCCI-i India nung asayartem asaya nungi anener melira bendanger league tem nung asayatsü memelar.

Taoba küm asayar tejen Yuvraj Singh nem Global T20 Canada nung asayatsü asoshi BCCI-i temelaba agütsüogo. Pa dak alaka India nung asayartem ka danga bendanger league nung asayar mali.

BILEMDANGANG

"Alakteta inyakba ajanga uludaktsür."